

COMUNICATO n. 2925 del 23/10/2024

Traduzione in ladino

Valutazion del risech levines: l'Euregio la scontra i raprezentanc de la comiscions di comuns

[Ladino] Chi che l é bon de valutèr ghenao l risech levines l pel salvèr vites umane, fajan referiment a racomanazions generèles, a fèr serèr la strèdes opuramenter, se l é debeseegn, a meter a jir n'evacuazion.

L é de emportanza fundamentèla la colaborazion anter i ence desvalives, ence co na vijion che va sorafora i confins. Per miorèr la valutazion del risech te dut l raion de l'Euregio Tirol-Südtirol-Trentin, i raprezentanc de la comiscions levines di comuns di trei raions i se à binà en vender ai 18 de otober aló da la senta de l'Euregio a Busan. La scontrèda l é stat ence n moment emportant per l projet Cairos Euregio, che l jirà inant enfin a l'aisciuda del 2026. L obietif l é chel de armonisèr e svilupèr amò de più i sistemes de lurier de la comiscions levines di trei teritories. Via per i ultimes meisc, n grop de esperc de la trei aministrazions, dessema coi fornidores di servijes del projet e co la comiscions levines de Prener e del Juf de Sela – desche arees model transfrontalieres selezionèdes – l à lurà fora la modalitèdes per ruèr a arjonjer chest obietif e i resultac i è vegnui porté dant belapontin en ocasion de la scontrèda a Busan. L confront l à permetù de binèr su spetadives, cruzies e idees, per integrèr l projet, olache se pel. L é n feedback emportant ence per l vèrech strategich che vegnarà fat per l projet Cairos, finanzia dal fon Fesr tel chèder del program Interreg Italia-Austria. Chiò defat se é do a svilupèr n software inovatif e pluringual, che l fae da strument plurifunzionèl per la documentazion, l'informazion e la comunicazion tel chèder del risech levines.

Atualmenter ti teritories de l'Euregio l é passa 2.000 comembres atives – per la maor pèrt volontères – te 346 comiscions levines. Ti Comuns che tol pèrt al projet ic i deida valutèr l risech de levines e i porta dant si consees dantdaldut ai ombolc competenc per l teritorie, che i raprejenta l'autorità più auta de Protezion zivila a livel de comun.

I resultac de Cairos i didarà dantdaldut la comiscions levines e la desvaliva istituzions de Tirol, Südtirol e Trentin te so lurier, i sentadins de l'Euregio i vedarà i efec del projet demò per via endireta.

Aboncont, la colaborazion miora, i strumenc più neves e na formazion coche carenea i arà n efet che se podarà veder canche, per ejempie tel cajo de pericol de levines, se podarà serèr la strèdes a na moda prezisa e segura e de manèr fora na comunicazion a na maniera chièra.

Enjonta: tabela

Fotoservije e imagines a cura de Euregio

Download images e intervistes chiò

<https://www.youtube.com/watch?v=Cn6GzoIiSXc>

<https://www.youtube.com/watch?v=NP-vyJH7N5w&t=1s>

<https://www.youtube.com/watch?v=g9oOoOgHKQY>

<https://www.youtube.com/watch?v=yqUc-kHrv4&t=2s>

Traduzion di Servijes Linguistics e Culturèi del Comun general de Fascia

(cdt)